



**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINA TEŠANJ  
OPĆINSKO VIJEĆE**

Broj: \_\_\_\_\_/24  
Datum: \_\_\_\_\_ 2024. godine

**" PRIJEDLOG "**

Na osnovu člana 36. i 37. Zakona o budžetima u Federaciji Bosne i Hercegovine ("Službene novine FBiH", broj: 102/13, 9/14, 13/14, 8/15, 91/15, 102/15, 104/16, 5/18, 11/19, 99/19 i 25a/22) i člana 14. Statuta Općine Tešanj ("Službeni glasnik Općine Tešanj" broj:11/07) Općinsko vijeće Tešanj na svojoj \_\_\_\_\_ sjednici održanoj dana \_\_\_\_\_ godine, donijelo je

**ODLUKU  
O IZVRŠAVANJU BUDŽETA  
OPĆINE TEŠANJ ZA 2025. GODINU**

**I - OPĆE ODREDBE**

**Član 1.**

Ovom Odlukom se uređuje način izvršavanja Budžeta Općine Tešanj za 2025. godinu (u daljem tekstu: Budžet), upravljanje prihodima i izdacima Budžeta, zaduživanju i davanju garancija iz Budžeta, te prava i obaveze korisnika.

**Član 2.**

Budžet se sastoji od Računa prihoda i rashoda, Računa kapitalnih primitaka i izdataka i Računa finansiranja.

**II - TRANSPARENTNOST I JAVNOST BUDŽETA**

**Član 3.**

Budžet je iskazan po funkcionalnoj, fondovskoj, organizacionoj i ekonomskoj klasifikaciji (po kategorijama, podkategorijama i stavkama).

Budžet je direktno vezan za Strategiju razvoja Općine Tešanj (veza sa ciljevima iz Strategije).

Budžet Općine Tešanj i izvještaji o izvršenju Budžeta za 2025. godinu će se objaviti u „Službenom glasniku Općine Tešanj“ i na zvaničnoj internet stranici Općine.

**III – RAČUNOVODSTVO I KONTROLA BUDŽETA**

**Član 4.**

Odgovorna osoba za izvršenje Budžeta u cjelini je Općinski načelnik, a ovlaštene osobe navedene u ovoj Odluci i drugim aktima (pomoćnici Općinskog načelnika i nosioci aktivnosti - programa) su pomoćni izvršioци i odgovorni su za namjensku upotrebu sredstava Budžeta.

Nadzor nad zakonitošću transakcija i računovodstvenih dokumenata prihoda i izdataka Budžeta vrši Službenik za računovodstvo u Službi za finansije, privredu, komunalne i inspekcije poslove.

Služba za finansije, privredu, komunalne i inspekcije poslove je obavezna podnositi izvještaj o izvršavanju Budžeta Općinskom načelniku, a Općinski načelnik Općinskom vijeću.



## IV - IZVRŠAVANJE BUDŽETA

### Član 5.

Sredstva Budžeta osiguravaju se budžetskim korisnicima unutar kojih su definisane potrošačke jedinice, a koje su navedene u posebnom dijelu Budžeta sa utvrđenim pojedinačnim pozicijama.

Korisnici budžeta, sa potrošačkim jedinicama, koriste budžetska sredstva samo za namjene koje su određene Budžetom i to do visine utvrđene na pojedinačnim pozicijama.

### Član 6.

Služba za finansije, privredu, komunalne i inspeksijske poslove vrši alokaciju sredstava po budžetskim korisnicima i potrošačkim jedinicama, koje su potom odgovorne za njihov namjenski utrošak. Budžet se realizuje putem odobrenih operativnih budžeta koji se formiraju prema dinamici realizacije odobrenih aktivnosti i planu novčanih tokova kojim se obuhvataju sve uplate i isplate sa jedinstvenog računa Općine.

Korisnici budžeta koriste budžetska sredstva u skladu sa operativnim planom i odobrenim programima, uzimajući u obzir utvrđenu dinamiku priliva i odliva sredstava.

Nadzor nad raspoloživim sredstvima za plaćanje u skladu sa uputama Općinskog načelnika i Budžetom vrši Službenik za finansije u Službi za finansije, privredu, komunalne i inspeksijske poslove.

O utrošenim sredstvima korisnici izvještavaju Odjeljenje za finansije i resorne općinske službe.

Služba za finansije, privredu, komunalne i inspeksijske poslove prati izvršenje operativnih budžeta i vrši izradu periodičnih i godišnjeg izvještaja. U slučaju umanjenja prihoda ili značajnijih promjena na strani rashoda Služba predlaže privremene obustave od izvršenja pojedinih rashoda, te ukoliko je to neophodno izmjene i dopune budžeta koje se donose po utvrđenoj budžetskoj proceduri.

### Član 7.

Postupak nabavke roba, investicijskih dobara, ustupanja radova i vršenje usluga mora se obavljati u skladu sa važećim propisima o javnim nabavkama, za što je u ime Općinskog načelnika odgovoran Službenik za javne nabavke i nosilac aktivnosti. Realizacija nabavki će se vršiti u skladu sa planom javnih nabavki koji će se objaviti na zvaničnoj internet stranici Općine.

### Član 8.

Općinski načelnik, na prijedlog Službe za finansije, privredu, komunalne i inspeksijske poslove, može vršiti preraspodjelu sredstava između pojedinih korisnika radi finansiranja nedovoljno predviđenih rashoda i izdatka. Ta preraspodjela može iznositi maksimalno 10% planiranih sredstava korisnika.

Služba za finansije, privredu, komunalne i inspeksijske poslove može, na zahtjev budžetskog korisnika, vršiti prestrukturiranje (preraspodjelu) sredstava unutar stavki rashoda odobrenih za pojedinog korisnika - organa uprave. Ukupna preraspodjela se može vršiti do 10% sredstava predviđenih za korisnika - organ uprave.

Više ostvareni prihodi i primici koji se ne utroše u tekućoj godini prenose se u cijelosti i predstavljaju prihod Budžeta za narednu godinu. Neutrošena sredstva u okviru planiranog nivoa budžeta, takođe, se prenose u cijelosti, a koriste se prvenstveno za realizaciju planiranih i ugovorenih a ne realizovanih aktivnosti u tekućem Budžetu.

Odluke o preraspodjeli sredstava će se objavljivati u „Službenom glasniku Općine Tešanj“.

### Član 9.

Budžet će se izvršavati po slijedećim prioritetima:

- povrat sredstava finansiranja,
- transferi za jednokratne novčane pomoći,
- plaće i naknade vijećnika i uposlenika,
- izdaci za materijal, energiju i usluge,
- transferi mjesnim zajednicama,
- tekući transferi i kapitalna ulaganja,
- ostalo.



#### **Član 10.**

O korištenju sredstava Operativne budžetske rezerve odlučuje Općinski načelnik na prijedlog Službe za finansije, privredu, komunalne i inspeksijske poslove. Služba za finansije, privredu, komunalne i inspeksijske poslove prijedloge za dodjelu sredstava operativne budžetske rezerve sačinjava isključivo po zahtjevima budžetskih korisnika i resornih službi kao potrošačkih jedinica koje su dužne iste obrazložiti u okviru obrasca zahtjeva za korištenje operativne budžetske rezerve.

Općinski načelnik je obavezan polugodišnje izvještavati Općinsko vijeće o raspolaganju - utrošku sredstava rezerve.

#### **Član 11.**

Ako se tokom godine, na osnovu zakona i drugih propisa, poveća djelokrug ili nadležnost korisnika što zahtijeva i povećana sredstva ili se osnuje novi korisnik, sredstva za njegove troškove osiguravaju se iz Operativne budžetske rezerve, a odobrava ih Općinski načelnik.

Ako se tokom godine, na osnovu zakona i drugog propisa, umanji djelokrug ili nadležnost korisnika, što zahtijeva smanjena sredstva, ili se korisnik ukine, neutrošena sredstva za njegove izdatke prenose se na korisnika koji preuzme njegove poslove uz odobrenje Općinskog načelnika.

#### **Član 12.**

Prikupljanje javnih prihoda i obavljanje platnih transakcija vrši se preko jedinstvenog računa Općine i blagajne Budžeta Općine.

Potpisnici naloga platnih transakcija putem računa iz stava 1. ovog člana su lica koja ovlašćuje Općinski načelnik.

#### **Član 13.**

Pogrešno ili više uplaćeni prihodi u Budžet, vraćaju se uplatiocima na teret tih prihoda ili stavke rashoda "Povrat poreza, izvršenja po presudama, prinudna izvršenja i sporazumna rješenja" ukoliko su isti uplaćeni u prethodnim godinama.

Rješenje o tome donosi Služba za finansije, privredu, komunalne i inspeksijske poslove po ovlaštenju Općinskog načelnika.

#### **Član 14.**

Sredstva na poziciji "Bruto plate i naknade plata uposlenih" će se realizovati prema osnovici za obračun plaće uposlenika u Organima uprave Općine Tešanj za 2025. godinu u visini od 425,00 KM.

Ovlašćuje se Općinski načelnik da tokom budžetske godine definiše vrijednost boda kako bi se uskladila potrebna sredstva za plaće sa raspoloživim budžetskim sredstvima.

Osnovica i bod su osnova za obračun plata i naknada, a definišu se članom 5. Zakonu o plaćama i naknadama u organima vlasti Federacije Bosne i Hercegovine ("Službene novine Federacije BiH", br. 45/10, 111/12 i 20/17).

#### **Član 15.**

Sredstva na pozicijama "Program zaštite od prirodnih nesreća (obuka, rad Štaba CZ, izrada Plana zaštite i dr.)" i "Interventne i preventivne mjere - ublažavanje i otklanjanje posljedica prirodne nesreće i sprečavanje nastanka novih šteta" realizovat će se na osnovu planova koje će sačiniti Služba civilne zaštite, a odobriti Štab civilne zaštite, odnosno Općinski načelnik.

Sredstva na poziciji "Komunalno uređenje (program komunalne higijene, uređenje javnih površina, ukrašavanje javnih objekata, parkova i ulica za vrijeme praznika, numeracija objekata, uklanjanje divljih deponija i dr.)" realizuju se kroz Program komunalne higijene za 2025. godinu.

Sredstva na pozicijama "Program uređenja potpornih zidova, novih zelenih površina i cvijetnjaka", "Ostale komunalne usluge - sanacija javne rasvjete i svjetlećih znakova", "Održavanje autobuskih stajališta, dječijih igrališta, oglasnih tabli, zaštitnih ograda i spomen obilježja", "Zimsko održavanje puteva prema usvojenom Programu (mreža lokalnih puteva Općine)", "Održavanje i sanacija makadamskih puteva, propusta i priključaka", "Održavanje asfaltnih puteva i ulica (sanacija udarnih rupa,



devijacija i drugih oštećenja)", "Postavljanje i održavanje horizontalne i vertikalne signalizacije" i "Uređenje taksi stajališta iz namjenskih sredstava" realizovat će se na osnovu programa i planova koje će sačiniti Služba za finansije, privredu, komunalne i inspeksijske poslove, a odobriti Općinski načelnik.

Sredstva na poziciji "Podrška projektima prema usvojenoj Strategiji - tekuće aktivnosti" realizovat će se na osnovu plana aktivnosti i realizacije pojedinih ciljeva iz Strategije po odobrenju Općinskog načelnika.

#### **Član 16.**

Sva rješenja kojima se dodjeljuju grant sredstva (ekonomski kod 614) će sadržavati odgovarajuću odredbu obaveze namjenskog trošenja i izvještavanja, te povrata sredstava u slučaju utvrđivanja nenamjenskog utroška i neutrošenog dijela sredstava.

Sredstva na poziciji "Grantovi mjesnim zajednicama za redovnu djelatnost i knjigovodstvene usluge" doznavačavaju se mjesnim zajednicama jednakim kvartalnim ili mjesečnim dotacijama u zavisnosti od raspoloživosti budžetskih sredstava i specifičnosti samog korisnika. Raspodjela se vrši prema važećoj Odluci o načinu i kriterijima raspodjele sredstava za finansiranje rada organa mjesnih zajednica, a u izuzetnim slučajevima na osnovu pojedinačnih zahtjeva. Iz ove stavke se finansira rad jedinstvenog knjigovodstvenog servisa za potrebe mjesnih zajednica i Društvenog centra.

Sredstva na poziciji "Zimsko održavanje puteva prema usvojenom Programu (mreža lokalnih puteva Općine) putem mjesnih zajednica prema pojedinačnim sporazumima" doznavačavat će se mjesnim zajednicama u skladu sa pojedinačnim sporazumima koji će za tu namjenu biti zaključeni.

Sredstva na poziciji "Grantovi mjesnim zajednicama za održavanje javne rasvjete sa zamjenom postojećih svjetiljki energetski efikasnijim" će se raspoređivati rješenjem Službe za finansije, privredu, komunalne i inspeksijske poslove, a na osnovu specifičnih potreba mjesnih zajednica.

U slučajevima kada se vrši obustava sredstava za mjesne zajednice po bilo kom osnovu navedenom u članu 6. Odluke o načinu i kriterijima raspodjele sredstava za finansiranje rada organa mjesnih zajednica ("Službeni glasnik Općine Tešanj", broj: 11/07 i 03/11), sredstva koja su tom prilikom obustavljena neće se retroaktivno isplaćivati mjesnoj zajednici, nego će se po otklanjanju nepravilnosti nastaviti finansiranje rada od narednog mjeseca.

Zadužuju se sve mjesne zajednice kojima se sredstva odobravaju za redovne aktivnosti, a ista im se doznavačavaju jednakim kvartalnim ili mjesečnim dotacijama, da po okončanju fiskalne godine, najkasnije do kraja februara naredne godine, dostave cjelovit izvještaj o namjenskom utrošku svih doznaka sredstava iz budžeta (narativni i finansijski dio).

#### **Član 17.**

Sredstva podgrupe "Grantovi socijalne zaštite i pomoći" u principu doznavačavaju se naznačenim korisnicima budžetskih sredstava (ustanove i udruženja) jednakim kvartalnim ili mjesečnim dotacijama u zavisnosti od raspoloživosti budžetskih sredstava i specifičnosti samog korisnika.

Služba za boračko-invalidsku zaštitu može posebnim aktom definisati bliži način transferisanja sredstava koja se izuzimaju od navedenog principa.

Sredstva za koja nisu naznačeni korisnici će se realizovati putem pojedinačnih zahtjeva, te prijedloga ili programa koje, na prijedlog općinskih službi, odobrava Općinski načelnik.

#### **Član 18.**

Sredstva na stavci "Grant Centru za kulturu i obrazovanje Tešanj (redovna djelatnost i održavanje zgrade)" doznavačavaju se Ustanovi jednakim kvartalnim ili mjesečnim dotacijama u zavisnosti od raspoloživosti budžetskih sredstava i specifičnosti samog korisnika.

Sredstva na stavkama "Grant Muzeju Tešanj" i "Grant Općoj biblioteci Tešanj" doznavačavaju se naznačenim korisnicima kvartalno ili po osnovu pojedinačnih zahtjeva.

Sredstva na pozicijama za koja nisu naznačeni direktni korisnici: "Grantovi osnovnim školama (tekuće potrebe)", "Grantovi srednjim školama (tekuće potrebe)" i "Grant predškolskim ustanovama - dječije igraonice" raspoređuju se prema pojedinačnim zahtjevima.



Sredstva na stavkama "Nabavka školskog pribora za učenike prvih razreda osnovnih škola Tešnja" i "Grant za posjetu završnih razreda osnovnih škola Srebrenici" realizovat će se prema programu Službe za društvene djelatnosti i investicije.

Sredstva na poziciji "Grantovi za projekte mladih i za mlade i podrška projektu Omladinska banka" raspoređuju se po prijedlogu raspodjele Službe za društvene djelatnosti i investicije koji će biti sačinjen na osnovu kandidovanih programa udruženja građana, osnovnih i srednjih škola, i drugih ustanova, te mjesnih zajednica (izuzev učešća u projektu Omladinska banka) i na osnovu pojedinačnih zahtjeva.

Sredstva na poziciji "Stambeno zbrinjavanje mladih" utrošit će se za regresiranje kamata za stambene kredite mladih putem javnog poziva koji će se realizovati sa jednom od poslovnih banaka.

Sredstva na pozicijama "Grantovi za obilježavanje praznika, jubileja, značajnih datuma Općine, kulturne i vjerske manifestacije i slično sa Programom obilježavanja tekovina odbrane 1992-95. i 1941-45. godine" raspoređuju se na osnovu planova i programa koji će biti sačinjeni od strane Službe za društvene djelatnosti i investicije, Službe za boračko-invalidsku zaštitu i opću upravu te finansiranjem pojedinačnih projekata i zahtjeva.

Sredstva na poziciji "Program stipendiranja - Sredstva za stipendije Ministarstva obrazovanja i finansijska podrška školovanju iz budžeta Općine" raspoređuju se redovnim studentima kojima je, putem konkursa, dodijeljena finansijska podrška Općine, kao i stipendije Ministarstva obrazovanja ZE-DO kantona po doznaci odobrenih sredstava općinskom Budžetu.

Sredstva na poziciji "Sredstva za stipendije studentima boračkih populacija iz sredstava Budžeta ZE-DO kantona" realizovat će se doznakama redovnim studentima kojima je, putem konkursa, dodijeljena kantonalna stipendija, odmah po doznaci sredstava iz Budžeta Kantona.

Sredstva na poziciji "Grant za angažovanje volontera u općinskim ustanovama" raspoređuju se prema sporazumima sa ustanovama ili u vidu refundacija dijela sredstava ustanovama koje su izvršile angažman volontera tokom godine, prema istim uslovima koji imaju volonteri u općinskoj administraciji.

Sredstva na poziciji "Grantovi ostalim organizacijama u oblasti kulture" raspoređuju se finansiranjem pojedinačnih projekata organizacija u oblasti kulture, a prema Odluci o kriterijima, načinu i postupku raspodjele sredstava nevladinim organizacijama i po Javnom pozivu za kandidovanje projekata udruženja i fondacija koje će finansirati Općina Tešanj.

Sredstva za planove, programe, zahtjeve i prijedloge navedene u stavu 5. i 6. ovog člana odobrava Općinski načelnik.

Zadužuju se sve javne ustanove kojima se sredstva odobravaju za redovne aktivnosti, a ista im se doznačavaju jednakim kvartalnim ili mjesečnim dotacijama, da po okončanju fiskalne godine, najkasnije do kraja februara naredne godine, dostave cjelovit izvještaj o namjenskom utrošku svih doznačenih sredstava iz budžeta (narativni i finansijski dio).

#### **Član 19.**

Sredstva na poziciji "Grantovi za rad sportskih klubova i društava i ljekarski pregled sportista" raspoređuju se pojedinačnim klubovima i savezima prema Odluci o kriterijima, načinu i postupku raspodjele sredstava nevladinim organizacijama po javnom pozivu za kandidovanje projekata udruženja i fondacija koje će finansirati Općina Tešanj i u izuzetnim slučajevima na osnovu zahtjeva.

Sredstva na pozicijama "Grant za razvoj sportske infrastrukture koja je na brizi sportskih kolektiva", "Klizalište i škola klizanja (najam)" i "Grant za Sportski savez Općine Tešanj" će se realizovati na osnovu pojedinačnih programa i zahtjeva klubova, Saveza i prijedloga Službe za društvene djelatnosti i investicije.

Sredstva na poziciji "Grant za Sportsko-rekreacioni centar i za razvoj sporta" doznačavaju se Sportsko-rekreacionom centru Tešanj jednakim mjesečnim iznosima, a prema ispostavljenim mjesečnim fakturama Ustanove.

#### **Član 20.**

Sredstva na stavci "Grantovi za rad udruženja od posebnog značaja za općinu Tešanj" rasporedit će se posebnom odlukom Općinskog načelnika udruženjima koja su definisana Odlukom Općinskog vijeća.



Sredstva na poziciji "Grantovi ostalim udruženjima građana" raspoređuju se udruženjima građana koja nisu izdvojena kao prioritetna u okviru Budžeta, a prema Odluci o kriterijima, načinu i postupku raspodjele sredstava nevladinim organizacijama i po javnom pozivu za kandidovanje projekata udruženja i fondacija koje će finansirati Općina Tešanj.

#### Član 21.

Sredstva na pozicijama "Grant Agenciji za razvoj za bruto plate i naknade" i "Grant Agenciji za razvoj za materijalne troškove" doznačavaju se jednakim kvartalnim ili mjesečnim dotacijama u zavisnosti od raspoloživosti budžetskih sredstava i specifičnosti samog korisnika.

Sredstva na poziciji "Grant Agenciji za razvoj za podršku projektima" doznačavaju se Agenciji po pojedinačnim zahtjevima i programima aktivnosti.

Sredstva na poziciji "Grantovi klubovima vijećnika OV-a" doznačavaju se klubovima prema važećoj Odluci Općinskog vijeća.

Sredstva na poziciji "Finansiranje Saveza općina i gradova FBiH" doznačavaju se kvartalno po usaglašenim protokolima i fakturama koje se dostavljaju.

Sredstva na poziciji "Podrška razvoju start up ideja mladih" i "Sufiansiranje programa zapošljavanja mladih kroz Dijaspora program (start up i drugo)" doznačavaju se po provođenju odabira korisnika sredstava po upućenom javnom pozivu.

Sredstva na poziciji "Grantovi za razvoj poljoprivrede" raspoređuju se finansiranjem programa novčanih podsticaja za unapređenje poljoprivredne proizvodnje koji svojom odlukom usvaja Općinsko vijeće.

Sredstva na poziciji "Podrška drugim projektima iz oblasti poljoprivrede (proljetna i jesenska sjetva i drugo)" raspoređuju se poljoprivrednim proizvođačima i udruženjima kao podrška aktivnostima i projektima, te po osnovu pojedinačnih zahtjeva, a na prijedlog Službe za finansije, privredu, komunalne i inspeksijske poslove.

Sredstva na pozicijama "Sredstva podrške za zapošljavanje i samozapošljavanje boračkih populacija iz Budžeta ZE-DO kantona" raspoređuju se na osnovu javnih poziva koji će biti raspisani od strane nadležnog Ministarstva.

Sredstva na poziciji "Grantovi za komunalne potrebe (uređenje fasada, zbrinjavanje pasa lotalica i drugo)" će se realizovati prema javnim pozivima i/ili pojedinačnim zahtjevima koje će obrađivati Služba za finansije, privredu, komunalne i inspeksijske poslove. Dodjela sredstava će se vršiti zaključenjem odgovarajućeg ugovora sa korisnikom.

Sredstva na poziciji "Grantovi za podršku projektima prema usvojenoj Strategiji razvoja i akcionim planovima (džender akcioni plan, SECAP i drugi)" realizovat će se na osnovu plana aktivnosti i realizacije pojedinih ciljeva iz Strategije po zahtjevu korisnika, kao i projekta iz džender akcionog plana, a po odobrenju Općinskog načelnika.

Sredstva "Podrška sajamskim aktivnostima (Sajma privrede u Tešnju, sajam pčelarstva i drugo)" će se utrošiti prema prijedlogu realizacije podrške od strane Službe za finansije, privredu, komunalne i inspeksijske poslove.

Sredstva na poziciji "Subvencioniranje usluga u javnom prijevozu" će se realizovati prema javnom pozivu koje će obrađivati Služba za finansije, privredu, komunalne i inspeksijske poslove, a u svrhu obezbjeđenja stale autobuske linije kružnog toka Tešanj-Jelah-Tešanjka. Dodjela sredstava će se vršiti zaključenjem odgovarajućeg ugovora sa korisnikom.

#### Član 22.

Stavke izdataka, tekućih i kapitalnih grantova koje se finansiraju iz namjenskih sredstava viših nivoa vlasti, međunarodnih institucija i drugih izvora kao, na primjer: "Podrška projektima i utrošak sredstava kapitalnih grantova viših nivoa vlasti i drugih izvora" "Sredstva podrške za zapošljavanje i samozapošljavanje boračkih populacija iz Budžeta ZE-DO kantona", kao i druga stavke koje zavise od visine ukupno doznačenih sredstava u Budžet, nisu limitirane i realizovat će se u zavisnosti od visine obezbjeđenih sredstava u vidu grantova - transfera viših nivoa vlasti, međunarodnih institucija i drugih izvora. Za dodatna doznačena sredstva bit će izvršeno uvećanje budžeta za tekuću godinu.



Sredstva utvrđena na pozicijama "Podrška projektima Evropske komisije i drugo - općinsko učešće" i "Podrška projektima i utrošak sredstava kapitalnih grantova viših nivoa vlasti i drugih izvora" koristit će se za namjene podrške kapitalnim projektima (sufinansiranje) na području Općine u vidu učešća u realizaciji kandidovanih projekata kod donatora ili drugih nivoa vlasti, kao i za utrošak sredstava drugih nivoa vlasti i drugih izvora.

Svi kapitalni grantovi (ekonomski kod 615) će se dodjeljivati potpisivanjem odgovarajućih sporazuma/ugovora sa krajnjim korisnicima, a izuzetno u slučaju manjih iznosa putem odgovarajućih rješenja sa odredbom obaveze namjenskog trošenja i izvještavanja, te povrata sredstava u slučaju nenamjenskog utroška i neutrošenog dijela sredstava.

Sredstva utvrđena na poziciji "Podrška Općine projektima organizacija i institucija van teritorije općine Tešanj" će se realizovati prema pojedinačnim zahtjevima za sufinansiranje projekata van teritorije Tešnja.

Sredstva utvrđena na poziciji "Sufinansiranje mjera energetske efikansoti - solarni paneli na zgradi JU Opće bolnice" će se realizovati doznakom grant sredstava naznačenom korisniku, a po osnovu odgovarajućih sporazuma o sufinansiranju/ugovora koji će biti naknadno potpisani.

Sredstva utvrđena na poziciji "Opremanje civilne zaštite, jedinica i službi iz sredstava posebne naknade" i "Opremanje vatrogasne jedinice iz sredstava Fonda za vatrogastvo i budžeta" koristit će se na osnovu planova koje će sačiniti Služba civilne zaštite i Štab civilne zaštite, a odobriti Općinski načelnik.

Sredstva utvrđena na poziciji "Utrošak sredstava od koncesija i naknade za korištenje šuma" raspoređuju se u skladu sa Odlukom Vlade ZE-DO kantona o načinu rasporeda i korištenja sredstava prikupljenih po osnovu kontinuirane naknade od koncesionara, te na osnovu važećih propisa o šumama. Ova sredstva će biti raspoređena na mikrolokacije definisane u okviru plana kapitalnih investicija za 2025. godinu.

Sredstva utvrđena na pozicijama "Projekt prikupljanja, odvodnje i prečišćavanja otpadnih voda na području općine Tešanj", "Sredstva za uređenje Starog grada – Gradine Tešanj i očuvanje pisane i materijalne baštine", "Rekonstrukcija raskrsnice Jelah", "Gradnja objekta osnovne škole 9. septembar Medakovo" i "Uređenje industrijskih zona i poslovne infrastrukture" utrošit će se u skladu sa definisanom namjenom, a po sticanju uslova za realizaciju (obezbjeđenje grant sredstava i tehničkih uslova).

### Član 23.

Sredstva na stavkama "Uređenje i izgradnja odbojnih i zaštitnih ograda, pješačkih i biciklističkih staza i autobuskih stajališta", "Revitalizacija rijeke Usore i nužna rekonstrukcija korita rijeke Tešanjke", "Uređenje rasvjete u urbanim zonama Općine", "Uređenje centralnog spomen obilježja u Tešnju i obilježja na drugim lokalitetima" i "Eksproprijacija i otkup zemljišta (rekonstrukciju puta Bukva -Tešanjka, implementaciju dijela RP Jugozapad Tešanj, put pored Dvorane Jelah i dr.)" utrošit će se na osnovu planova koje će sačiniti nadležne općinske službe, a odobriti Općinski načelnik za potrebe kapitalnih investicija Općine. Općina u slučaju postojanja odgovarajuće ponude i potrebe može se vršiti otkup zemljišta i bez definisanog javnog interesa, uz odgovarajuće odluke donesene od strane Općinskog vijeća.

Sredstva na stavci "Izrada projektne dokumentacije projekata javno-privatnog partnerstva" će se realizovati na potencijalne projekte javno-privatnog partnerstva koji će usvojiti Općinsko vijeće.

Sredstva utvrđena na poziciji "Vodosnabdijevanje (dodatne količine vode i razvoj distributivne mreže)" utrošit će se na planirane projekte koji su podržani od strane lokalnih sredina, nadležnog kantonalnog Ministarstva i donatora, a bit će iskazana u okviru liste kapitalnih investicija Općine.

Sredstva koja se odnose na kapitalna ulaganja u Organu uprave na stavkama "Nabavka opreme, objekata i vozila za potrebe funkcionisanja Organa uprave" i "Informatička i druga oprema i nabavka softvera za Općinu (unapređenje hardverske infrastrukture, serverska oprema, digitalizacija usluga - e građevinska, tableti za Općinsko vijeće i drugo)" utrošit će se prema planovima resornih službi koje će odobriti Općinski načelnik.

### Član 24.



Sredstva utvrđena na poziciji "Kapitalna ulaganja (Plan kapitalnih investicija)" raspoređuju se na osnovu posebnog plana-liste koju usvaja Općinsko vijeće, a u kojoj će taksativno biti navedene kapitalne investicije za finansiranje iz Budžeta za 2025. godinu.

Visina sredstava koja se odnose na učešće mjesnih zajednica u kapitalnim projektima i njihov utrošak nisu limitirani planiranim iznosima u Budžetu. Za dodatna doznačena sredstva bit će izvršeno uvećanje Budžeta za tekuću godinu.

Sredstva utvrđena na pozicijama sa ekonomskim kodom 615311 bit će doznačena naznačenim korisnicima budžeta putem granta odmah po sticanju uslova za realizaciju kandidovanih projekata ili će se realizovati od strane nadležnih općinskih službi uz obavezu prijenosa izgrađenog objekta, opreme ili drugog sredstva krajnjem korisniku putem usvajanja odgovarajuće odluke.

#### **Član 25.**

Odluka kojom se definišu kapitalna ulaganja i svi programi i planovi utroška sredstava navedeni u ovoj Odluci donijet će se u roku od 90 dana od dana usvajanja Budžeta.

#### **Član 26.**

Obavezuju se sve općinske službe koje provode javne pozive za dodjelu sredstava krajnjim korisnicima, da kod definisanja kriterija, obavezno uključe džender komponentu tamo gdje je naglašena razlika u zastupljenosti, tako da za ovu namjenu definišu koeficijent u raspodjeli za manje zastupljeni pol sa dodatnih 5 do 10% sredstava.

#### **Član 27.**

Općinski načelnik će predložiti uravnoteženje Budžeta ako se u toku budžetske godine, zbog izvanrednih i nepredviđenih prilika i potreba, znatnije umanje prihodi ili uvećaju rashodi, a u skladu sa članom 37. Zakona o budžetima u Federaciji BiH.

### **V - ZADUŽENJE I GARANCIJE**

#### **Član 28.**

Općina Tešanj će za 2025. godinu izvršiti povlačenje dijela kreditnih sredstava po Ugovoru sa Ministarstvom finansija Federacije BiH iz sredstava EIB-a, za potrebe realizacije projekta prikupljanja, odvodnje i prečišćavanja otpadnih voda na području općine Tešanj do visine od 300.000,00 KM.

Iz Budžeta Općine je odobrena garancija za kreditno zaduženje JP Toplana d.d. Tešanj u ukupnoj visini od 500.000,00 KM, čime se Budžet Općine za 2025. godinu opterećuje za rezervaciju u visini od 60.000,00 KM.

Planirana je otplata dijela kreditnih sredstava po Ugovoru sa Ministarstvom finansija Federacije BiH iz sredstava EIB-a od 270.000,00 KM.

### **VI – FISKALNA ODGOVORNOST**

#### **Član 29.**

Rukovodilac budžetskog korisnika i potrošačkih jedinica (pomoćnik načelnika i drugi) je odgovoran za:

1. zakonito i namjensko korištenje sredstava i
2. efikasno i uspješno funkcioniranje sistema finansijskog upravljanja i kontrolu u okviru budžetom utvrđenih sredstava.

Rukovodilac je dužan svake godine za prethodnu budžetsku godinu, za period u kojem je obavljao poslove rukovodioca, popuniti izjavu o fiskalnoj odgovornosti.



Izjavu iz stava 2. ovog člana Rukovodilac dostavlja Službi za finansije, privredu, komunalne i inspeksijske poslove koje provjerava njen sadržaj.

Uz izjavu se prilažu i planovi otklanjanja slabosti i nepravilnosti utvrđenih od nadležnih organa, izvještaj o otklonjenim slabostima i nepravilnostima utvrđenim u prethodnoj godini i mišljenje internih revizora (interne kontrole) o sistemu finansijskog upravljanja i kontrola za oblasti koje su bile revidirane u prethodnoj godini.

## VII - ZAVRŠNE ODREDBE

### Član 30.

Ova Odluka stupa na snagu objavljivanjem u "Službenom glasniku Općine Tešanj", a primjenjivat će se na budžetsku 2025. godinu.

Predsjedavajući Općinskog vijeća  
Amir Kurtić, dipl.ing.elteh.

### O b r a z l o ž e n j e:

#### I PRAVNI OSNOV:

Pravni osnov za donošenje Odluke o izvršavanju Budžeta Općine je sadržan u članu 7. Zakona o budžetima u Federaciji Bosne i Hercegovine ("Službene novine FBiH", broj: 102/13, 9/14, 13/14, 8/15, 91/15, 102/15 i 104/16, 5/18, 11/19 i 25a/22).

#### II RAZLOG ZA DONOŠENJE:

Zakonom o budžetima u Federaciji Bosne i Hercegovine definisano je da Općinsko vijeće uz budžet donosi i odluku o izvršavanju budžeta prije početka budžetske (fiskalne) godine.

Pojedine stavke Budžeta Općine za 2025. godinu iskazane u bilansu prihoda, primitaka, izdataka, rashoda i povrata kredita i garancija nisu definisane po direktnim nosiocima, niti je određena bliža namjena i način utroška sredstava.

Donošenjem ove Odluke definišu se odredbe koje omogućavaju provedbu usvojenog Budžeta, određuju odgovornost i način utroška sredstava, kontrolu utroška sredstava i izvještavanje o ostvarenju - izvršenju Budžeta za 2025. godinu, a čime se obezbjeđuje veća transparentnost i javnost Budžeta.

#### OBRAĐIVAČ

Služba za finansije, privredu,  
komunalne i inspeksijske poslove  
Amel Karahmet, dipl.oec.



#### PREDLAGAČ

OPĆINSKI NAČELNIK

Mr.sci.Huskić Suad



Broj: 02-11-1-2658-2/24  
Datum:20.12.2024. godine



